

## UiTM tambah baik proses tuntutan ganti rugi pelajar PhD dan Sarjana langgar kontrak biasiswa

Oleh [Suzalina Halid](#) - Oktober 11, 2023 @ 2:31pm  
[suzalina@bh.com.my](mailto:suzalina@bh.com.my)



Gambar fail - Naib Canselor UiTM, Prof Datuk Dr Roziah Mohd Janor memeriksa kawalan kehormatan Polis Bantuan UiTM yang disertai 101 pegawai dan anggota. FOTO Ihsan UiTM

KUALA LUMPUR: Universiti Teknologi MARA (UiTM) sudah membuat penambahbaikan proses tuntutan ganti rugi pelanggaran perjanjian terhadap pemegang biasiswa peringkat doktor falsafah (PhD) dan Sarjana yang tidak mencapai objektif.

Naib Canselor UiTM, Prof Datuk Dr Roziah Janor, berkata penambahbaikan itu dibuat dalam aspek kutipan semula hutang terbabit yang dilaksanakan sejak dua tahun lalu.

Malah beliau berkata, UiTM juga sudah melantik pihak bagi proses kutipan hutang dalam kalangan pemegang biasiswa yang tidak memenuhi perjanjian.

"Itu dari laporan audit pada 2021...penambahbaikan proses (dilaksanakan) bagi kutipan hutang sudah ditambah baik ketika saya jadi Naib Canselor.

"Kita sudah lantik (pihak) untuk buat kutipan...jawatankuasa krisis akan menjelaskan kepada media," katanya kepada BH, di sini hari ini.

Roziah dilantik sebagai Naib Canselor UiTM pada September 2021, sekaligus menjadi wanita pertama dilantik dalam jawatan itu.

Semalam, Laporan Ketua Audit Negara Tahun 2021, mendedahkan UiTM menanggung kerugian berjumlah RM58.57 juta, selepas ramai penerima biasiswa yang menandatangani perjanjian ke peringkat Ph.D dan Sarjana gagal mencapai objektif ditetapkan.

Ketua Audit Negara, Datuk Wan Suraya Wan Mohd Radzi, dilaporkan berkata audit 2021 mendapati, potensi kerugian UiTM terhadap ganti rugi belum tuntutan adalah berjumlah RM51.08 juta.

Audit berkaitan Tuntutan Ganti Rugi Penghutang Pecah Kontrak (pemegang biasiswa mungkir perjanjian) UiTM, turut menemui hapus kira terhadap penghutang pecah kontrak berjumlah RM6.23 juta; dan ganti rugi berjumlah RM1.26 juta tidak dapat dituntut.

Pada tahun 2021, seramai 1,496 pemegang biasiswa mungkir dengan nilai tuntutan ganti rugi keseluruhan berjumlah RM117.16 juta.